


TEZAUUR LITURGIC

26 IUNIE

SLUJBA SF. IERARH IOAN, EPISCOPUL GOTHIEI CRIMEII



MOSCOVA, 2000



Месяца июня 26 дня Святителя Иоанна, епископа Готфскаго

На малой вечерни

На Господи возвах: стихирь на 4, глас 3:
Твоими подвиги, святителю Иоанне, / горы и
источницы освятишася, / и еретическая
прелесть упразднися; / град же твой от бед
избавляемый // песнь тебе радостно приносит.
Просветишася всяческая, / празднующе летнюю
твою память: / море просия, взыграша облацы,
/ Церковь же православная страны Таврической
// песнь тебе радостно приносит.
Святителю исповедниче Иоанне, / икону твою
лобызающе, благодарственно взываем: /
радуйся, нечестия противу икон возстающих
победителю, / храмы земли твоя ныне назирая,
// украшенные святыми образы.
Чудес источниче и благодати, / напояй водою
живоносною град твой; / укрепи в нем веру
православную, / воспитай чада наша в
верности Церкви Божией, // яже омыла есть
вселенную Крещения водами.

Слава, глас 6:

Святителю, ты еси лозы Христовы розга, / во
Иверии дивно процветшая, / и в Таврии плод

принесшая, / молися ко Господу, //
помиловатися нам, чадом твоим.

И ныне, Богородичен, глас той же:
Богородице, Ты еси лоза истинная, /
возрастившая нам плод живота, / Тебе молимся,
/ молися Владычице, / со святыми апостолы, //
помиловатися душам нашим.

На стиховне стихиры, глас 2.

Подобен: Доме Евфрафов:

Доме добродетелей, / Иоанне священне, / от
Бога власть приемый, / вязати и решити грехи,
// и нас от сих избави твоими молитвами.

Стих: Честна пред Господем, / смерть
преподобных Его.

Граде, верху горы стояй, / апостолов преемниче,
/ благовестия рачителю, / грады и веси иже в
Таврии, // посещати не престай, молимся.

Стих: Блажен муж, бояйся Господа, / в
заповедех Его восхощет зело.

Мечу духовный, / поседаю злочестие, / во
бранех грозный, / ересей сокруши главы, //
воздвизающыся на Церковь Божию.

Слава, глас и подобен тойже:

Свеще церковная, / от сот Евангельских
происходящая, / в Церкви сияющая, / души
наша воспламени, отче премудре, // рачением
любве Божественныя.

И ныне, Богородичен, глас и подобен тойже:
Дево Пречистая, / вселенную облагодатившая, /
не забуди отечество наше, / страну при мори
добротрачную, // да плодами веры
Православныя просияет.

Тропарь писан на велицей вечерни.
Слава, и ныне: Гавриилу вещавшу:

На велицей вечерни

Блажен муж: 1-й антифон.

На Господи возвах: стихиры на 8, глас 8.

Подобен: О преславнаго чудесе:

Отче Иоанне прехвальне, / паствы Готфския
избранниче, / веры правыя исповедниче, /
монахов, иже в Таврии, наставниче; /
благоразсудну и трезвенну душу устроиый, / и
Божественныя догматы уясниый, / истины
Христовы источник явился еси, / от негоже
мудрость почерпаем, // и ревности исполняем
еже о славе Божией.

Отче Иоанне пресильне, / храбрый воине
духовный; / град Дорос, иже посреде неба и
земли, / от враг заступити потщался еси, /
ревностию огнедохновенною, / и труды
иноческими, в первое достояние возводящими,
/ собрал еси воины Христовы, / и собою
возглавив, привел еси, // исповедати Имя
Святое Его.

Отче Иоанне пречудне, / страждущих
избавителю, / недужных исцелителю, /
враждующих умирителю; / ты на земли яко
безплотен явился еси, / на воздух тебе
взймавшуся в молитве прилежней, / ныне же на
небеси Богу предстоя со ангелы, / моли
даровати чтущим память твою // грехов
прощение и велию милость.

Приидите, инок множество, / и всяк чин и
возраст рода церковнаго, / свечи имуще
стецемся, / в похвалу украсителя земли нашея; /
егоже в мори шествие бысть преславно, / от
страны изгнания во град рождения; / и ныне
духом с нами пребывает, / чудесми же
милосердия сияет, // яко орел духовный скоро
облетая концы.

Ины стихиры, глас 4:

Возведи очи твои, Иерусалиме, / и виждь
северную страну чужедальную, / от неяже
прииде к тебе чадо светообразное, / от горнаго
Дороса на гору Фаворскую, / прежде страдания
и изгнания своего, // свет Воскресения ища
приятя, в тебе сияющий.

Возвеселися о чаде своем духовнем, Иверие, /
столп животворящ во храме Святых апостол
имущая, / ты бо воздвигла еси Таврии апостола,
/ и столпа церковнаго Готфския паствы, / Нины

преславныя лозу восприимшаго, // и виноград
духовный при мори насадившаго.

Вспомяни славу твою, святая Византие, / како
христианский мир объяла еси, / кую красоту во
образех святых явила еси, / колик сонм
свидетелей Христовых возрастила еси, / от
нихже единого Иоанна воспой, // поборника
честных икон возставления.

Возрадуйся днесь, Церковь Русская, / единого
от сонма святых Таврических видя
прославляема, / апостолу Андрею
Первозванному последователя, / святителю
Клименту Инкерманскому подражателя, /
священномученик Херсонесских почитателя, /
Стефану Сурожскому единомравнаго, // Иоанна
святаго, пределов Партенитских хранителя.

Слава, глас 1:

О велия победы твоея, святителю, / яко темницу
претерпев, небеса наследовал еси, / и аще не в
житии от работы горькия люди избавил еси, / но
по смерти явися победа преславна, /
нечестивых бо во уделе твоём преиде
господство; / темже и мы со Ангелы-хранители
древних храмов ликовствующе, // поем на
горах Таврических Троицу Единосущную.

И ныне, Богородичен: Всемирную славу:

Вход. Прокимен дне. Чтения преподобническа.

Премудрости Соломоновы чтение (главы 5 и 6):

Праведницы во веки живут:

Премудрости Соломоновы чтение (глава 3):

Праведных души в руце Божией:

Премудрости Соломоновы чтение (глава 4):

Праведник, аще постигнет скончаться, в покои
будет:

На литии стихиры, глас 1:

Искапайте, горы, сладость, / и холми, яко агнцы
взыграйте, / святую память празднующе /
Таврии насельника, святителя Иоанна; /
разрешивый родителей неплодство, / и ересей
господство разоривый, // моли, преподобне,
спастися душам нашим.

Богознаменитый день, светом исполнен, / во
граде Партените нам возсия, / се бо
молитвенник к Богу теплый, / святитель Иоанн
невидимо с нами предходит, / болящия исцеляя,
/ грешныя вразумляя, / к совершенству
текущим тайны Божия открывая, // и молится
спастися душам нашим.

Проповедник был еси Православия в земли
нашей, / юже украсил церквами и обительми
Христовыми, / и инок множество собрал еси, /
народу же церковному любовь Божию делы

уяснил еси, / Емуже и ныне о нас молися, //
подающему миру велию милость.

Слава, глас 5:

Храм во граде твоём во имя твое создася, /
преподобне Иоанне, / в немже Спаситель наш
Христос Господь, / Пречистыя Своя Тайны
верным подает, / Солнце Сый правды, /
просветити хотя, иже прежде неведущих Его; /
темже, святителю, / яко имеяй дерзновение ко
Христу, // Того моли спастися душам нашим.

И ныне, Богородичен:

Храм и дверь еси, палата и престол Царев, /
Дево Всечестная, / Еюже Избавитель мой,
Христос Господь, / во тьме спящим явися, /
Солнце сый правды, / просветити хотя, яже
созда по образу Своему, рукою Своею; / темже,
Всепетая, / яко матернее дерзновение к Нему
стяжавшая, // непрестанно моли спастися
душам нашим.

На стиховне стихиры, глас 2.

Подобен: Егда от Древа:

Егда во мраце неведения, / Готфстии людие
седяху, / воистинну зверонравни бывше, / вся
окрестныя страны устраиша, / и мечем я
вземше, при мори водворишася; / егда же от
плененных христиан благонравие усвоивше, /
кротцыи земледелателие и овец пастырие

явишася, / страннолюбцы и боголюбцы, // и храмов Божиих строителие.

Стих: Честна пред Господем / смерть преподобных Его.

Егда услыша святыи Златоуст / Готфских людей к свету Христову обращение, / о научении их Писанию Священному поревнова, / предстоятели им воздвизая, / и от ереси арианския ограждая, / и по смерти с небесе их назирая; / егоже молитвами / ты, святителю Иоанне, в Готфии процвел еси, // заступлением тезоименитаго укрепляемъ.

Стих: Блажен муж, бойся Господа, / в заповедех Его восхощет зело.

Егда дерзость хазарскую посрамил еси, / народ Божий за правую веру воздвигнув, / от единоплеменник оклеветан был еси, / иже дело твое разориша, / и в руке врагов губителей тя предаша; / но от верных чад спасенный, // во Амастриде ко исходу своему уготовился еси.

Слава, глас 6:

Преподобне отче, / исповедниче и воине Христов, / аще и мощем твоим не имамы поклонитися, / зане сокровенни ныне суть от очию нашею, / обаче храм во имя твое Бог чудесно воздвиже, / яко град велик на горе сияй, / вонъже притекаем, / просяще

прощения прегрешений // и душам нашим
веля милости.

И ныне, Богородичен.

На благословении хлебов тропарь святителю
дважды и Богородице Дево: единожды.

Тропарь, глас 1:

Православныя Таврии покровителю, /
Партенитских пределов украсителю, / чудес
милосердия источниче, / истины твердый
исповедниче, / святителю, отче Иоанне, / моли
Христа Бога, Егоже от юности возлюбил еси, /
ревность о Богоугождении нам даровати, //
умирити мир и спасти души наша.

Ин тропарь, глас 2:

Образ твой почитающе, молим тя, святой, /
просяще полезная душам нашим, / ты бо душу
свою на всяк день Церкви ради полагал еси, / да
избавиши паству, Богом данную, от работы
вражия, / темже, Иоанне исповедниче, вопием
ти: // радости исполни православно поющих
память твою.

На утрени

На Бог Господь: тропарь: Православныя
Таврии: дважды.

Слава, ин тропарь. И ныне, Богородичен: Вся
паче смысла:

По 1-м стихословии, седален, глас 2:

Река духовная милости сый, / реки и источники
людem извел еси, / и потоки учений источил еси,
/ нивы, к жатве готовыя, серпом Христовым
пожал еси, / в житницу Божию, во храмы, люди
собирая.

Слава, и ныне, Богородичен:

Мати Божия, независтный источник сущи, /
землю и море иконами Твоими освятила еси, / и
потоки милосердия всем источила еси, / Жизни
хлеб, Христа миру родила еси, / Таинство Тела и
Крове Своея Церкви открывшаго.

По 2-м стихословии, седален, глас 6:

Наследниче Божий, сопричастниче Христов, /
веры забрало, щите граду твоему духовный, /
святителю отче Иоанне, / готфом, тавроскифом
и елином добрый пастырь явился еси, / нам же
всем ходатай спасения, / темже молим тя, /
воспламени души наша / о вере Православней
подвизатися.

Слава, и ныне, Богородичен:
Богоотроковице Дево, Мати Христова, / верным
Божественный покрове, / безбожным же
грозное вразумление, / заблуждшим обращение,
/ всего мира очищение, / темже молим тя, /
воспламени души наша / о вере Православней
подвизатися.

По полиелеи седален, глас 4:
Церкве нашае воинствующия под знаменем
Креста, / воин храбрый воистинну явился еси, /
святителю исповедниче Иоанне, / в соединение
веры и в разум славы Божия нас приводяй, /
суемудрие же и расколы истребляяй; / темже
память твою благочестно празднующе, /
ревность о защищении святыни церковныа
просим нам даровати.

Слава, и ныне, Богородичен:
Богородице, Предстательнице Тебе поющих, /
воеводо Взбранная, присно враги
побеждающая, / стена граду нашему буди и
ограждение, / болящим исцеления дарующи, /
неведающая же вразумляющи; / темже к иконе
Твоей припадающе, величаем Тя, / Пресвятая
Дево, Богоизбранная Отроковице.

Таже степенна, 1-й антифон 4-го гласа.

Прокимен, глас 4: Честна пред Господем /
смерть преподобных Его.

Стих: Что воздам Господеви о всех, яже воздаде
ми?

Всякое дыхание:

Евангелие от Матфея, зачало 43.

По 50-м псалме стихира, глас 6: зри славник на
стиховне.

Канон, глас 8.

Песнь 1

Ирмос: Истрясшему в мори мучительство
фараоне, / и Израиля сушею наставльшему, //
поим Христу, яко прославися во веки.

Явившему в мире свидетельство Христово, /
днесь, святителю, тебе припадаем, / и слово нам
подати просим во еже воспети тя достойно.

Приморския Таврии стража необоримаго, /
днесь восхвалим с волнами плещуце, / с горами
подглашающе птиц пению.

Святое рождение сведуще Партенитско, / Богу в
Троице славимому помолимся, / воздвигшему
щит граду нашему, Иоанна.

Богородичен: Избавльшую мир от насильства
греха и ада, / чистотою же к подвигу
привлекшую, / поим Марию Богородицу
прилежно.

Песнь 3

Ирмос: Несть свят яко Господь, / и несть праведен яко Бог наш, / Егоже поет вся тварь: // несть праведен паче Тебе Господи.

От неплодных ложесн, / плод молитвы явился чистый, / пощения меч приемь, / пришел еси в меру мужей апостольских.

Чадо Церкви Святыя, / воспитанное благодатию, / благий нрав и ум стяжав, / дар

исповедничества приял еси, егоже испроси нам.

Неописан Существом, / во образех Христос написася воплощаемь, / Емуже мы, яко

Единому от Троицы, богопоклонение, приносим, / иконам же почитание, от Иоанна научившеся.

Богородичен: Воплотивыйся Бог / плоть приял от Тебе, о Дево, / честныя иконы и Крест, / в залог усыновления нам даруя.

Седален, глас 4:

Священными книги снабдевая обитель твою, / и благолепием ю украшая, / явился еси пастве твоей книга одушевленная, / и образ светел Христов, / и доньне пути спасения нам являеши.

Слава и ныне, Богородичен, глас тойже: Учению Божественному прилежно внимая, / и душу добродетельми украшая, / явилася еси книга Христова одушевленная, / Мати Божия,

Слову плоть взаимоотношавшая, / и миру спасение даровавшая.

Песнь 4

Ирмос: Из горы приосененная, Слово, пророк, / Единная Богородица, / хотяща воплотиться боговидно усмотри, // и со страхом славословяще силу Твою.

От Таврии горная пришел еси в Вифлеем, / звездою веры водимый, / достигнув же Иерусалима священнаго, / поклонился еси Солнцу Христу, Воскресшу от Гроба.

Христа ради вся оставльшим в бедах помози, / ты бо тленное презрев богатство, / обрел еси дома, и села, в молитве тя призывающия, / и инок сословие во отечествии твоём усыновил еси.

Птице подобяся, яже на столпостенах, / на гору Богом созданную, / Того взыскуя, часто восходил еси, / научи и нас молитвенному Святей Троице предстоянию.

Богородичен: Иноков Игумению славно почтим, / Единую Богородицу, / чистоты ищущим Хранительницу, / Гору несекому и Скинию Небесную.

Песнь 5

Ирмос: От ночи неведения, / боговедением
Просветивый концы, // просвети мя утром
человеколюбия Твоего Господи.

На святые иконы брань воздвигшу царю
повинующимся, / страха ради мирскаго и
лихоимания безумнаго, / сим противитися учил
еси, верныя утверждая.

Фаросе светлый, возсиявый на мори, / лучи
веры испущаяй во вся концы, / от ересей
мрачных соблюди ны, молимся.

Святые Троицы сосуде избранный, / слово
премудрости возглаголал еси, / якоже святии
Дамаскин и Стефан, защищая иконы мужески.

Богородичен: Образи Твои, о Дево Мати
Господня, / милости чудесы озаряют грады и
страны, / Православную веру в мире
проповедующе.

Песнь 6

Ирмос: Якоже пророка избавил еси / из глубины
преисподния, Христе Боже, / и мене от грехов
моих избави яко Человеколюбец, / и управи
живот мой, молюся.

Спразднует нам Иверия святая, / чистоту бо
веры сохранишь иногда, / даде тебе
архиерейства благодать, / яко чистоты сосуду
благоуханному.

Паствы милосердный заступниче, / святым
церквам архитектоне премудрый, / град твой и
ныне защиты, / храмы Божии в земли твоей
умножи.

Авраама в дубраве Троице припадшаго,
слышавше, / готфи, иже первее древесем
поклоняющийся, / древнее заблуждение
отложиша, / по сих же, ветвь Христу, Иоанна
принесоша.

Богородичен: Апостоли Тебе зряще, Мати Дево, /
укрепляхуся теци на благовестие, / сих
наследники, архипастыри и пастыри наша
укрепи, / якоже иногда святителю Иоанну
сотворила еси.

Кондак, глас 4.

Подобен: Вознесыйся на Крест:

Партенитских предел светильника и заступника,
/ храмов здателя, иноков наставника, / и
врагов сопротивоборца, Иоанна воспоим: /
оружие бо взем - Крест Господень, / на святых
иконы враждующих потреби прелесть / и яко
теплый предстатель к Богу // просит даровати
нам грехов прощение.

Икос:

Партенитским пределом, пастыря иногда не
имущим, / истиннаго и добраго пастыря Бог

дарова, / учительна и человеколюбива, / чудес
подателя и долгов решителя, / догмат
Православных хранителя, / веры истинныя
ревнителя, / иже иереом яко брат бысть, /
народу же яко отец, / и ныне предстоя престолу
Христову / и о уделе своем молитвы возсылая,
// просит даровати нам грехов прощение.

Песнь 7

Ирмос: В начале землю основавый, / и небеса
словом утвердивый: / благословен еси во веки,
// Господи Боже отец наших.

Между землею и сводом небес, / Божиим
велением град устроися, / егоже от врагов
нечестивых спасти потщался еси, / Иоанне,
наследниче святых отец наших.

Пленения от враг не устрашился еси, / но ино
страшное рекл, еже впасти в руке Божии /
отметающимся Христа, яко Иуда, / от сего
злодействия соблюди нас, чад твоих.

Троицы поборники воспитай во уделе твоём, /
крепость духа нам подавая, / и на брань со
враги спасения нашего воздвизая, / якоже
иногда людем Готфским воевода явился еси.

Богородичен: Не мир, но меч принесе на землю
Христос, / сия бо юдоль есть изгнания нашего, /
и кто нас заступит, аще не ты Богомати, / яко и
Твою душу пройде оружие людей злочестивых.

Песнь 8

Ирмос: На горе святей прославльшася, / и в купине огнем Приснодевы Моисеови тайну явльшаго, / Господа пойте // и превозносите во вся веки.

Чудесы и цельбами, иже от тебе бываемыми, / проповедати Христа не престаеши, / о сих бо жителие страны твоея поведаяюще, / овы к сокрушению, овы же ко Крещению обращают. Песньми сретоша монаси тело твое, / в праздник Апостол по морю пришедшее, / и нас почитающих память твою, / сподоби тя узрети во Царствии Небеснем.

Троицы Предвечныя молитвенниче, / век свой уведети сподобивыйся, / четыредесять дней помедлив, изшел еси на суд Божий / противу князя хазарскаго, мучителя.

Богородичен: Угоден Богови явился еси, / Пречистой же Богородице приятен, / темже на небесех ныне радуяся, / помяни нас недостойных, тя призывающих.

Песнь 9

Ирмос: Проявленное на горе законоположнику во огни и купине, / Рождество Приснодевы, / в наше верных спасение, // песньми немолчными величаем.

Коль красны на горах ноги благовествующих

Христа, / от нихже одинаго поем тя, / неустанно
пределы Таврии обходяща, / и пекущаяся о
душах наших.

Видеша тя ученицы стояща на воздухе, / внегда
молитву деяти о страждущих во уделе твоём, / и
ныне возвыси помышления наша, / ко отечеству
истинному, небесному.

Таврии концы настави / православно почитати
Троицу Святую, / и нам чадом твоим днесь,
святителю Иоанне, / помози начало
богоугоднаго жития положить.

Богородичен: Дар Божий воистинну верным
дался еси, / Пречистыя Богоматере образ, /
Егоже целуем, благодаряще Иоанна,
исповедника, / возставления икон ревнителя.

Светилен, глас 8:

Свет Святыя Троицы пастве проповедал еси, /
паче солнечных луч на горе духовней сияющ, /
на нюже взыти верныя научил еси / лестницею
добродетелей и ревностию огнесветлою.

Слава и ныне, Богородичен, глас той же:
Свет миру Рождшая, Дево Всенепорочная, /
Небесных сил превысшая, / молитвами твоими
верным помози, / свет Сына Твоего восприяти.

На хвалитех стихиры на 4, глас 1.

Подобен: Небесных чинов:

Еленю в жажде текущу на источники вод, /
посреде гор проходящих, / уподобился еси, яко
жаждущий правды; / темже востек на Гору
блаженств Евангельских, / источник благодати
Христовы соделался еси, // и истины водами
горы Таврии доньне напояеши.

Пчела трудолюбная цветы гор облетает, / ладия
скорая пристани обходит; / ты же нас, чад
своих духовных посещати не устаеши, /
крылами любви быстродвижимь, / да приидем в
пристань Небесную, // да явимся благоухание
Христово.

К морю волнящуся, емуже предел есть песок, /
непреложный Божий глагол бысть: / до сего
дойдеш и не прейдеш, / но в тебе сокрушатся
волны твоя; / той же глагол рцы, святителю,
днесь, якоже древле, // горькому морю ересей
на ны воздвигаемому.

Исчести песок морской неудобно есть, / ниже
звездам небесным меру составить, / тако и
чудесем твоим, святителю Иоанне, / всечасно на
нас являемым; / аще и согрешихом паче песка
морскаго, // но твоею звездою путеводими
есмы.

Слава, глас 4:

Сподобившеся Божественныя Пасхи причастится, / и на всяк день память святых празднующе, / благодарение принесем Церкви Матери, / и единого от святых Ея, Иоанна исповедника прославим, / научимся ревности его о доброделании, / утвердимся обетованием заступления его, / не обленимся на молитву и бдение, / но последуим постом на диавола победу нам показавшему, // Спасу душ наших.

И ныне, Богородичен:

Любовию, Чистая, Твою икону почитающим, / и Божию Тя истинную Матерь согласно возвещающим, / и верно покланяющимся Ти, / хранительница явилася еси, / и державное предстательство, / отвращающи всякое лютое далече сих, // яко вся могущая.

Славословие великое. И отпуст.

На литургии
служба преподобному.

